

## Tiago remimombe'ukwe epístola de Tiago

<sup>1</sup> Xe Tiago Tupā Nhandejáry rembigwái. Nhandejáry Hesu Cristo rembigwái ave xe. Amondo uka-ta kwatia-rehe xe nhe'ẽ peẽ-my gwarã. Peẽ judeu kwéry Hesu reroviaha va'e opa-rupi judeu e'ŷ kwéry pa'ũ-my peiko va'e ahai-ta peẽ-my. Mba'éixa pa peiko, xe re'ýi kwéry?

*Jaiko asy ramo jepe, nhande reko vy'a reheve  
joty tajaiko katu*

(Lc 6.22-23; Rm 5.3; 1 Pe 4.14)

<sup>2-4</sup> Opaixagwa nhande mbovy'are'ŷ va'e pende johu meme para'e. Upéixa jaiko ramo ndaha'éi jarova hagwã nhande rekoha Nhandejáry-gwi. Nhane mbojerovia tee hagwã-rehe ójehe oheja upe va'e ojehu nhande-vy. Upéixa-gwi jahasa asy ramo jepe nhande reko vy'a reheve tajaiko katu. Ha peẽ katu, xe re'ýi kwéry, pende-rehe ndija'éi ramo Hesu-rehe ndojeroviái va'e, pende rereko asy ramo jepe, pende reko vy'a reheve joty tapeiko katu. Pende rasy ramo jepe, pende poriahу verei ramo jepe, pende reko vy'a reheve joty tapemondo katu pende resa Nhandejáry-rehe. Pehasa asy ramo jepe ani joty perova teĩ pende resa Nhandejáry-gwi, xe re'ýi kwéry. Ndaha'éi nhane mbovy'are'ŷ hagwã rei jahasa asy. Nhane mombaraete hagwã-rehe ae nhane mbojerovia tee hagwã-rehe ae ójehe Nhandejáry oheja nhane mbohasa asy va'erã ojehu nhande-vy. Upéixa jajerovia

tee ramo jaiko arā inhe'ẽ-rupi jaipyhy porāve arā nhane arandurā. Hesu remimbota jajapo kwaā va'erā. Upéixa ramo he'i va'erā peteĩ teĩ nhande-rehe “Ipy'a ijagwyje-ma oiko-ma xe nhe'ẽ-rupi” he'i va'erā Hesu nhande-rehe.

**5** “Xe arandu mbyky eterei. Ndajapo kwaái Nhandejáry remimbota.” Aipo ere para'e ndejéupe nde py'apy-py erenhemongoeta-vy. Aipo ramo ejerure katu íxupe ne arandurā-rehe: “Ajerure ndevy xe arandurā-rehe. Nde mante xe mo'aranduta”. Upéixa ere arā íxupe. Ha'e ohendu arā voi ne mo'arandu hagwā. Ipy'a porā eterei-gwi ha'e ome'ẽ meme va'e nhande-vy nhane remikotevē. Upéixa ramo nde a'o e'ỹ rehevē nde rexakwaa rei arā ne rembijerure ome'ẽ-vy.

**6-8** Erepordanu jave Nhandejáry-pe “Ome'ẽ-ta xe-vy, tapa nome'ẽ mo'āi xe-vy” ani aipo ere teĩ. Ani upéixa ererekō mokōi nhe'ẽ nde py'a-py. Inhe'ẽ mokōi va'e oiko ygwasu yvytu omomýiharami. Ojere jere oiko-vy. Nhande, Hesu-rehe ja-herovia va'e ndikatúi jaiko upéixa. Inhe'ẽ mokōi va'e-pe Nhandejáry nome'ẽ mo'āi hembjerure, ndoherovia teéi-gwi hese.

### *Ani ne mba'e reta-rehe anho erezv'a*

**9-10** Peẽ ae pevy'a katu Hesu re'ýi kwéry voi peẽ. Ojoha'e-rami meme pende rerekō Nhandejáry pejerovia-gwi hese. Pevy'a katu. Ambue kwéry nde rerekō asy ramo jepe, nane mba'e retái ramo jepe, evy'a katu eiko-vy. Nhandejáry nde rerekō-ma gwa'ýry-rami gwajýry-rami ave. Ha nde, Hesu re'ýi jepe ne mba'e reta reta ererekō vyteri va'e. Gwekogwypyve-rami nde rerekō

ramo jepe evy'a katu. Nhandejáry-rehe mate erevy'a va'erã. Yvoty pya'e ipoty piruha-rami voi ndahi'aréi va'erã imba'e reta reta rei va'e.

<sup>11</sup> Kwarahy osẽ ramo, kwarahy ojope-ma ramo, ipoty piru-ma yvoty. Ombopirupa-ma kwarahy. Upéixa ave om̄ba'e reta-rehe anho rei oiko va'e oiko. Hetave ogwereko hagwã-rehe om̄ba'apo javé, ipiru ete ho'a hagwã oho-vy. Upéixa-gwi ne mba'e reta reta jepe, nde rerekó ramo gwekog-wypyve Hesu-rehe ha-py evy'a joty eiko-vy. Peẽ, Hesu reroviaha kwéry, pevy'a meme katu peikovsky.\*

### *Jejavy rehewa nhe'ẽ*

<sup>12</sup> Oiko asy ramo jepe Hesu-gwi ojevy e'ŷ joty va'e ový'a voi joty oiko-vy. Nhandejáry rape-gwi ndojeréi joty-gwi ome'ẽ va'erã íxupe hekove opa e'ŷ va'erã. “Xe rayhu va'e-pe ame'ẽ va'erã hekoverã opa e'ŷ va'erã” he'i va'ekwe-gwi ome'ẽ va'erã íxupe.

<sup>13</sup> Erehasa asy rei ramo erenhemongeta ramo nde py'a ndive ereva hagwã erejejavy hagwã, ani ere teĩ “Xe mbojejavy ukase para'e Nhandejáry. Xe mbova ukase para'e Nhandejáry” ani peje teĩ. Ndaipóri voi Nhandejáry-gwi inharanduve va'e ombojejavy uka hagwã Nhandejáry-pe. Ha'e ave nhane mbojejavy e'ŷ va'e voi. Avave-pe nombojejavy ukaséi Nhandejáry. Nhandejáry heko porã va'e voi.

<sup>14</sup> Nhandejéhegwi voi nhanhetantea nhande ae jajejavy hagwã. “Xe mbo'e vai-gwi, ajapo vai” oĩ he'i va'e mo'ã. Ndaha'ei upéixa. Nhandejéhegwi ae

---

\* <sup>1:11</sup> Sl 102.4,11; Is 40.6-8

jajapo vai. Nhande py'a-py jajapose va'e ae-gwi, nhanhembotavy.

<sup>15</sup> Nanhande pu'akavéi-ma nhandéjeho jajejoko kwaa hagwā. Jajejavý joto. Jajapose-gwi rei jajapo. Nhandedjéhegwi nhanohē nhane rembiaporā jajapo va'erā. Upéixa-gwi nhane rembiapo vai nhandejéhegwi rei mante jajapo. Nhane rembiapo vai eterei ramo nhane mboyke arā ojéhegwi Nhandejáry.

<sup>16</sup> Ani penhembotavy xe re'ýi kwéry, xe rembiayhu kwéry.

<sup>17</sup> Nhandedjáry-gwi ou mba'e porā. Opa mba'e iporā va'e imarāne'ý va'e ome'ëmba nhande-vy. Ha'e ojapo va'ekwe entéro tesapeha yváy pygwa. Kwarahy ojapo va'ekwe. Jasy ave, jasytata ave, jasytatagwasu ave ojapo va'ekwe. Hemimoin-gokwe va'e heko ambue mbue. Ha'e ae peteĩ tekoha ogwereko. Kwarahy okanhy va'e. Jasy oiko rei va'e. Nhandedjáry ae katu tekoha peteĩ ogwereko. Iporā meme joto hekoha Nhandedjáry.

<sup>18</sup> Ojéhegwi voi gwemimbota-rupi nhande poravo va'ekwe gwe'yirā. Nhe'ë anhetegwa va'e jarovia. Upéa-rupi nhane moingo gwe'ýi ramo entéro gwembiapokwe-gwi nhane moporāseve Nhandedjáry.

<sup>19</sup> Upe va'e peikwaa xe re'ýi kwéry, xe rembiayhu kwéry. Upéixa-gwi ekirirī porā eiko-vy ere-jeapysaka porā hagwā nhe'ë-rehe. Ani erenhe'ë erepensa e'ý rehewe. Eha'arō nde rapixa onhe'ë ranhe hagwā. Ani ave pende poxy pya'e a'e teĩ.

<sup>20</sup> Nhande poxy rei rei ramo ndajaikói Nhandejáry rekoha-rupi. Hemimbota ndajajapóiry.

**21** Upéixa ramo ani pende poxy rei rei ojóupe. Epoi kena nde poxy rei reiha-gwi.

Opa nde rekoha rei-gwi epoi ave. Anive ne mandu'a ne rembiapo vairā-rehe. Nhandejáry nhe'ē-rehe ae katu ne mandu'a. Ha'e omoī-ma onhe'ē nde py'apy-py. Erovia kena inhe'ē kuri erejeheko kirirī-vy. Inhe'ē-rupi ereiko ramo ne resende tee va'erā Nhandejáry.

**22** Pehendu kena inhe'ē. Oĩ inhe'ē ohendu rei va'e, ojapo e'ŷ va'e, onhembotavy va'e. Ani upe va'e reko-rupi ereiko. Nhandejáry nhe'ē remimombe'u ejapo kena. Ndereroviái ramo inhe'ē erenhembotavy rei-ma arā ereiko-vy.

**23-24** Jahexa nhane ra'anga epéco-py. Jajere rire ndajahexavéi-ma nhane aŷgwe. Pya'e nanhane mandu'avéi-ma hese. Upéixa ave Nhandejáry nhe'ē ndogweroviái va'e. Ohendu ramo ohendu rei ha ojere oho ramo opa jevy-ma íxugwi.

**25** Anhetegwa tee va'e Nhandejáry nhe'ē. Nhane mo'arandu Nhandejáry reko-rupi jaiko hagwā ponove ipu'aka nhande-rehe tekoha vaiha. Nhahendu-ma ramo nhanhongatuma ramo nhande py'apy-py Nhandejáry nhe'ē nokanhy mo'āvéi-ma va'erā nhandéhegwí. Hemimombe'ukwe-gwi ndajava java mo'āvéi va'erā. Nhane mandu'a porā meme va'erā Nhandejáry nhe'ē-rehe. Upéa-rehe opamba'e nhane rembiapo gwive ohovasa meme va'erā nhande-vy Nhandejáry.

**26** Nhanhe'ē rei rei ramo nhande rapixa-pe, ja'e rei arā nhandéjehe "Ajerovia-ma Hesu-rehe".

Upéixa ramo nhanhembotavy rei mante va'erā jaiko-vy.\*

<sup>27</sup> Ây amombe'u-ta nde-vy mba'éixa pa Nhandejáry Nhande Ru yváy pygwa oipota ójehe ojerovia va'e oiko. Ha'e nhane mo'arandu gwemimbota-rupi jaiko hagwā. Oipota nhaipytygwō tyre'ŷ oiko va'e-pe, ime omano va'ekwe va'e-pe ave nhaipytygwō pono ohasa asy oiko-vy. Oipota ave japoí nhane rembiapo vaise hagwe-gwi. Upéixa nhande reko ramo, "Erejerovia tee-ma xe-rehe" he'i va'erā nhande-vy Nhandejáry.

## 2

*Nhandejáry Hesu Cristo-rehe ojerovia va'e ndog-wereko joavy avýi va'erā gwapixa-pe*

<sup>1</sup> Tapejeapysaka katu xe nhe'ë-rehe xe re'ýi kwéry, Nhandejáry Hesu Cristo rерoviahа kwéry. Peteïxa jaiko-ma Nhandejáry ipu'aka marangatu tee va'e ndive. Upéixa-gwi peteïxa tapejogwereko porã meme rei katu. Oĩ imba'e reta va'e-pe ogwereko porã va'e ha iporiahu va'e-pe katu ndogwereko porai peteïxa. Upéixa ani tei pejogwereko joavy avy imboete-vy.

<sup>2-4</sup> Peteïxa ndapejogwereko reíry ramo ojogweroaty ha-py ou va'e-pe, niporai voi. Ijaо porã va'e-pe, ikwairũ hepyve reheve ou va'e-pe eremboeteve ramo ijaо porã e'ŷ va'e-gwi, niporai voi nde rekoha. Upéixa ramo erereko joavy avy imboete-vy Hesu-rehe ojerovia va'e kwéry-pe. Ijaо porã va'e-pe mante henagwā porarã eremombe'u

---

\* **1:26** Sl 34.13; Tg 3.2-12

ramo, nerepenái javé iporahu va'e-rehe, eremboete joavy avy íxupe kwéry. "Enhembo'y rei eĩ-vy" ere ramo iporahu va'e-pe, "Yvy-py egwapy" ere ramo eremboete e'ŷ-vy íxupe, níporã voi upéixa ererekó joavy avy ramo nde rapixa kwéry-pe. "Ipy'a porãha ojehexa voi ijao porã-rehe voi" ere ramo ijehexa rei omboete va'e-rupi ereiko. Nerenhemongeta porã voi nipo ra'e nde py'apy-py. Imboetepyrã-rupi ndereikói. Ani upéixa nde reko joavy teĩ avave-pe.

<sup>5</sup> Tapejeapysaka porã kena xe nhe'ẽ-rehe, xe rembiayhu kwéry. Nhandejáry oiporavo meme iporahu va'e kwéry-pe ojerovia porã hagwã ójehé. "Xe rayhu va'e-pe aiko arã huvixarã ramo" he'i. "Xe moirã tee va'erã hikwái" he'i va'ekwe Nhandejáry. Ha'e he'i hagwe-rami ave ojapo meme.

<sup>6</sup> Upéa-rehe napene mandu'avéi para'e. Napemboetéi ramo iporahu va'e kwéry-pe, Nhandejáry reko-rami e'ŷ peiko íxupe. Ma'erã tipo. Napene mandu'avéiry imba'e reta va'e rekoha-rehe. Ha'e kwéry pende rerekó asy rei voi. Pende jokwái rei rei. Pende reraha rei ave mburuvixa renda-py ojapo hagwã pende-rehe ojapose va'e.

<sup>7</sup> Onhe'ẽ rei ave Nhandejáry Hesu Cristo-rehe. Inhe'ẽ reroviaha va'e-rehe onhe'ẽ vai ramo, Nhandejáry Hesu Cristo-rehe ae onhe'ẽ vai.

<sup>8</sup> "Ne ndivegwa-pe ehayhu kena nde reko erehayhuha-rami ave"\*\*  
ohai uka va'ekwe Nhandejáry Nhande Ruvixa nhande rekorã-rehe. Erejapose ramo inhe'ẽ tekotevã erehayhu rei enterovéa-pe.

---

\* **2:8** Lv 19.18

**9** Penhomboete joavy avy ramo, pene rembiapo vai-ma voi. Upéa-rehe Nhandejáry nhe'ẽ erejapo e'ŷ ramo, ojekwaa-ma voi nde-rehe nde reko jekyllava.

**10** Oĩ heta Nhandejáry nhe'ẽ Moisés amyrĩ remimombe'ukwe nhande rekorã. Upe mixĩ jepe ndojapói va'e osẽ jotty inhe'ẽ-gwi. Opyta osẽmba ete va'e-rami. “Osẽmba ete xe nhe'ẽ-gwi” he'i hese Nhandejáry.

**11** Onhe'ẽ-py he'i va'ekwe “Ani eremenda menda reise teĩ ereiko-vy” he'i va'ekwe. “Ani ereporojuka teĩ” he'i ave va'ekwe onhe'ẽ-py. Aipo ramo Nhandejáry remimombe'ukwe rendu-gwi nomenda mendái teĩ oiko-vy va'e oporojuka ramo osẽ-ma hemimombe'ukwe-gwi. Hembiapo vai jotty.\*

**12-13** Aipo ramo nhamondo kena nhande resa nhane renonderã-rehe. Ogwahẽ arã peteĩ áry Nhandejáry nhande rerekro reko hagwã nhane rembiapo apokwe-rehe. Hesu remimbota-rupi e'ŷ jotty jaiko ramo ndojohu porã arã nhandrehe. Hemimbota-rupi ae jaiko ramo ojohu porã arã nhandrehe. Upéa-rehe ha'e-ta peẽ-my pende reko peheja kena ipogwy-py. Tapejoporahuvereko rei kena enterove va'e ndive. Ndajaiporiahuverekói ramo nhande-rehe ndija'éi va'e-pe, Nhandejáry ave nanhande poriahuverekói ave arã. Jaiporiahuvereko ramo enterovéa-pe Nhandejáry ave nhande poriahuvereko ave va'erã. Ovy'a va'erã nhande-rehe ojohu ramo nhane rembiapokwe.

---

\* **2:11** Ex 20.13-14; Dt 5.17-18

*Nhandejáry-rehe jajerovia teeħa reħegwa nhe'ẽ*

<sup>14</sup> Ndajarovái ramo nhande rekoha “Ajerovia-ma Hesu-rehe” ja'e ramo, ja'e rei. Upéixa ramo ndovaléi-ma voi nhande jeroviahha mo'ã, xe re'ýi kwéry.

<sup>15-16</sup> Pene mandu'a kena iporiahu va'e-rehe. Nhane nhe'ẽ-py rei jahovasa ukase ramo, gwekorupi joty oiko iporiahu va'e. Oĩ ramo nhane pa'ũ-my Hesu reroviahha iporiahu va'e pene nhe'ẽ reirupi napeipytygwõi va'erã íxupe. “Nhandejáry tandem rovasa katu nde ao repyrã ereheka-vy” peje rei íxupe. “Nhandejáry tane mbopy'agwapy katu ne rembi'u repyrã ereheka hagwã” peje rei ave íxupe. Pene nhe'ẽ-py rei pehovasa ukase mo'ã Nhandejáry-pe. Iporiahu joty va'erã voi.

<sup>17</sup> Upéixa ave nhane rembiapo porã e'ŷ rehevə “Ajerovia-ma Hesu-rehe” ja'e ramo, ja'e rei ójehə. Nhande reko tujakwe-rupi joty jaiko.

<sup>18</sup> Oĩ para'e pene pa'ũ-my gw̄i xe remimombe'u ombojevyse va'e: “Ndaha'éi peteħxa nhande reko nhande Nhandejáry ndive jaiko porã va'e kwéry” he'i rei va'erã. “Oĩ hese ojerovia tee va'e. Oĩ ave hembiapo porã rei va'e” he'i rei va'erã. “Mokõive ombovy'a va'erã Nhandejáry-pe” he'i rei va'erã nhande reko-rehe. “Xe, xe rembiapo porã-rehe ambovy'a Nhandejáry-pe. Nde ae, Ajerovia-ma Hesu-rehe ere-gwi nde ave erembovy'a íxupe. Ndaha'éi peteħxa nhande reko nhambovy'a hagwã íxupe” he'i rei arã nhande reko-rehe.

Aipo peje ramo, aipo ramo tanhemonhe'ẽ xe peẽ-my. Mba'eixa-rami po ereiko arã Hesu reroviahha ramo ne rembiapo porã e'ŷ rehevə? Mba'eixa-rami po ereikwaa arã nde ae nde jeroviahha? Xe

ae xe rembiapo porã-rupi aikwaa uka enterove-pe Hesu-rehe ajeroviamaha. Iporã voi nhande reko nhambojoja nhane nhe'ẽ ndive.

**19** “Peteĩ anho Tupã Nhandejáry” peje nipo ra'e. Upéa peje ramo anhetegwa voi ne nhe'ẽ. Upéa mante ere ramo ae ne'írã ererovia porã-ma íxupe. Anháy kwéry upéixa ave he'i hese. Onheresende e'ŷ hagwã jepe ikyhyje-ma íxugwi.

**20** Pende tavy vyteri nipo ra'e. Napene mandu'avéi-ma nipo ra'e hekoha porã e'ŷ reheve oiko jave he'i ramo “Arovia-ma Hesu” ndovaléi voi ijерoviahа. Upéa nhe'ẽ pemokanhy-ma nipo ra'e pendejéhegwi.

**21** Upéixa-gwi apomomandu'a jevy-ma Abraão amyři rekowwe rehewa nhe'ẽ-rehe. Gwekoha porã reheve ojerovia va'ekwe Nhandejáry-rehe hemimbota ojapo-vy. Ome'ẽ hagwã Nhandejáry-pe ojuka-ta mo'ã va'ekwe gwa'ýry Isaque-pe. Nhandejáry omboete-vy hemimbota ojapo-vy, ojuka-tama ramo Nhandejáry he'i “Ojerovia tee nipo ra'e xe-rehe. Xe remimbota ojapo hagwã nahakate'ŷi gwa'ýry-rehe. Oiko xe nhe'ẽ-rupi. Ipy'a potĩ-ma Abraão” hei hese.\*

**22** Ojerovia tee hese oiko-vygwi Nhandejáry remimbota ete ojapo va'ekwe oiko-vy Abraão. Ohexa uka ijерoviahа gwembiapo porã-rupi.

**23** Upe rire Nhandejáry he'i kwatia-rehe onhe'ẽ-py: “Abraão ojerovia Nhandejáry-rehe. Ojerovia tee ójehe-gwi, Ipy'a potĩ-ma, he'i hese Nhandejáry.” “Xe irũ tee-ma voi Abraão” he'i ave hese.\*

---

\* **2:21** Gn 22.1-14    \* **2:23** Gn 15.6

**24** Upéa-rehe nhane mandu'a ramo jaikwaa arā ave: Ojerovia rei hese va'e nombovy'ái Nhandejáry-pe. Ohexa porāse ave nhande rekoha nhande-rehe Nhandejáry “Ipy'a potī-ma” he'i hagwā nhande-rehe.

**25** Upéixa voi ave Raabe amyrī Nhandejáry reroviah-a-rupi hembiapo porā va'ekwe. Kunha ikwimba'ese va'e jepe upe hembiapo porā-rehe “Ipy'a potī” he'i joty va'ekwe hese Nhandejáry. Josué amyrī remimondo va'e-pe Raabe omogwahē porā va'ekwe gwóga-py. Ojaho'i íxupe imonhemi hagwā. Tape ambue-rupi omondo ijukaharāgwegwi iresende-vy. Upe hembiapo porā-rehe Nhandejáry he'i hese “Ipy'a potī-ma” he'i hese.\*

**26** “Hesu-pe arovia-ma” ja'e ramo nhane rembiapo porā e'ŷ reheve, hetekwe ndovaleveiha-rami ave ndovaléi nhande jeroviaha.

### 3

#### *Nhande juru ipu'aka nhande-rehe*

**1** “Xe ave, amombe'use Nhandejáry nhe'ẽ poromo'aranduha-rami” ere ramo, pejeapysaka kóa xe nhe'ẽ-rehe, xe re'yí kwéry. Ogwahē arā nhande óra nhane rembiapokwe-rehe nhane monhe'ẽ hagwā Nhandejáry. Ore oroporomo'arandu va'ekwe-pe ore rerekoso asyve va'erā Nhandejáry ore rembiapo vaikwe-rehe. Upéa-gwi ha'e-ta peẽ-my iporāve ndahetái pene pa'ũ mygwa oiko inhe'ẽ poromo'aranduhaty.

**2** Nhande kwéry, enterove, nanhane arandúi voi. Jajejavý javy voíte jaiko-vy. Nhande juru nhane

---

\* **2:25** Js 2.1-21

mbojejavy rei ave. Ha nanhanhe'ẽ reíry ramo mba'eve-rehe ndajajejavýi arã ra'e. Upéixa ramo ndajajejavýi arã ra'e, nhande pu'aka tee arã ra'e nhandéjehe.

<sup>3</sup> Pene mandu'a porã kena. Kavaju juru-py nhamoĩ imbogwataharã. Mixĩ jepe ogwerogwata porã ojáry-pe kavaju. Ijáry oipota ha-rupi oho joty kavaju.

<sup>4</sup> Kanoagwasu tuvixa vixa va'e-rehe pene mandu'a ave. Imbogwataha mixĩ jepe ogwerova joty kanoagwasu ijáry-pe. Imbogwataha-rehe imbogwatase ha-rupi, ogweraha joty ojáry-pe. Yvytu hatã vai-rupi jepe oho joty.

<sup>5</sup> Ha'e ramigwa voi nhande juru. Nhande rete rehegwa mixĩ voi nhande juru. Mixĩ ramo jepe ipu'aka tee joty heta mba'e-rehe.

Nhane mandu'a kena tata-rehe ave. Mixĩmi oĩ ramo hesa'imi ramo jepe ojepota joty. Hendy-ma oho-vy. Nande pu'akavéi-ma hese. Ka'agwygwasu jepe ohapypa voi oho-vy. Tuvixa va'ekwe jepe ohapypa voi.

<sup>6</sup> Upéixa ete nhane nhe'ẽ ojepysø oho-vy. Tata-rami voi anháy rembiporu-rami nhande juru. Nhanhe'ẽ hetave ramo nhande reity vaive ive oho-vy nhande juru. Nhande rapypa va'erã nhande juru.

<sup>7</sup> Jaipota ramo nhande pu'aka opaixagwa mymba kwéry-rehe nhamománso hagwã. Ka'agwy rupigwa mymba jepe, mymba oveve va'e jepe, osyryry va'e jepe, ygwasu rupigwa jepe nhande pu'aka voi hese.

<sup>8</sup> Nhande juru-rehe ae avave ndaipu'akái. Nda-jajoko kwaái nhande juru. Nanhande rerekó

kirirī kwaái nhande juru. Nanhanhe'ẽséi ramo jepe nhanhe'ẽ voi joty. Jaiporu rei nhande juru. Mbói nhande su'u va'e-rami nhande juru nhande mbohasa asy va'erā.

<sup>9</sup> Jaiporu nhande juru nhamboete hagwā Nhandejáry-pe. Ha upe rire katu nhanhe'ẽ vai nhande rapixa-rehe. Gweko-rami nhane moingo va'ekwe Nhandejáry. Aipo ramo, nhanhe'ẽ rei ramo nhande rapixa-rehe, Nhandejáry rekoharami hemimoingo va'ekwe-rehe nhanhe'ẽ rei ave. Upe va'e naiporāi voi.

<sup>10</sup> Upéixa ramo peteĩ nhande juru-gwi osẽ nhe'ẽ vai nhe'ẽ porā ave. Omboete joavy onhe'ẽ vai ndive. Niporāi upéixa nhande rekoha, xe re'yí kwéry.

<sup>11</sup> Ygwa-gwi peteĩxa osẽ y. Y he'ẽ va'e osẽ ramo ndikatúi osẽ y iro va'e íxugwi. Peteĩ ygwa-gwi peteĩxa meme osẽ. Nhande juru ae ndaha'éiry upeixagwa. Osẽ jopara nhane nhe'ẽ.

<sup>12</sup> Figo máta-gwi nosẽiry azeitona oliveira'a. Uva máta-gwi ndajaipe'ái figo. Upéixa ave peteĩ ygwa-gwi nanhanohẽ mo'ai he'ẽ va'e, y iro va'e ndive. Upeixagwa e'ŷ nhande juru. Naiporāi voi upéixa nhande reko, xe re'yí kwéry.

*Arandu Nhandejáry remime'ẽ rehegwa nhe'ẽ  
(1 Co 2.6-7)*

<sup>13</sup> Tekotevē nhande reko porā reheve jaiko, xe re'yí kwéry. Oĩ ramo pene pa'ũ-my inharandu porā va'e ombojekwaa va'erā ójehe gwekoha porāha. Hexaha e'ŷ jepe onhemboete e'ŷ reheve jepe inharandu porā-gwi gweko kirirī reheve ojapo arā gwembiapo porārā rei.

**14** Nhande py'a-py nhandejéupe gwarā mate jaipota meme ramo, nhande rapixa ogwerekva'e-rehe nhapena rei rei ramo, nhanhemon-hemoyrō ramo, "Xe arandu porā-ma xe" ja'e rei mo'ā nhandéjehe. Ani upéixa teī nhande apu nhandéjehe, xe re'yí kwéry.

**15** Aipo ramo jaiko ramo, nhane arandu vérampomo'ā nhandejéupe. Nhandejáry nome'ēi upeix-agwa arandu nhande-vy. Nhane akā-gwi rei upe va'e. Teko rei-gwi ae upe va'e ave, anháy reko ae upe va'e.

**16** Nhande rapixa ogwerekva'e-rehe nhapena rei rei ramo, nhandejéupe gwarā jaipota eterei ramo, ndajajohúi ramo, nanhande py'agwapyvái va'erā. Jaikwaa e'ý reheve nhande ayvupa rei arā ojóehe. Nhanhomonhe'ē mbojevy jevy rei va'erā. Nanhande reko jojái va'erā onhondive. Opáixagwa mba'e vai ave jajapo arā nhane pa'ū-rupi.

**17** Nhandejáry remimombe'u-rupi ae nhane arandu ramo nanhane rembiapo vaivéi-ma va'erā. Nhande py'agwapy va'erā peteīxa onhondive. Nhande reko kirirī reheve jajogwereko va'erā. Nanhanhe'ē asýi arā ojóupe. Jahexakwaa va'erā nhande rapixa-pe hemikotevē nhame'ē-vy. Nanhane rakate'yi va'erā mba'eve-rehe. Nhane rembiapo porā porā rei va'erā ojóupe.

**18** Nhande py'agwapy reheve jaiko ramo, ija'e'ý va'e ojóehe nhambojoja porā jevy va'erā imbopy'agwapy-vy onhondive. Temitýgwe járy oh'a'arō ojaty va'ekwe hi'a hagwā. Upéixa ave nhaha'arō jaiko-vy nhande py'agwapy reheve Nhandejáry rekoha tee-rupi jaiko hagwā.

## 4

*Yvypóry remimbota rehewa nhe'ẽ*

<sup>1</sup> Niporãi voi pende rekoha. Penhonhe'ẽ mbojevy jevy nipo ra'e peiko-vy onhondive. A'e'ỹ rei nipo ra'e perek ojõehe. Ma'erã-gwi upéixa peiko? Ndéjehe rei mante nipo erenhemongeta ngeta ra'e nde py'apy-py. Ne remimbota ndejéupe gwarã-rehe mante nipo ne mandu'a ra'e. Upéixa-gwi peẽ ojoekoha-rehe napende a'éiry.

<sup>2</sup> Ne mba'e porãrã ndererekói va'e-rehe mate nipo ne mandu'a meme ra'e. Nde reko porãverã mo'ã-rehe peiko rei-vy. Ndererekói-gwi ereporojukase mo'ã nipo ra'e ne rembijukakwe mba'ekwe ererekoko hagwã mo'ã ne ma'era. Imba'e ndererekói-gwi nipo erenhe'ẽ mbojevy jevy ne a'e'ỹ-vy nde rapixa-rehe ra'e. Ne remimbota nderehupityí nipo ra'e Nhandejáry-pe nderejeruréi-gwi ra'e.

<sup>3</sup> Ne remimbotarã-rehe erejerure ramo Nhandejáry-pe, nome'ëi nde-vy nde-vy gwarã. Nome'ëi pono ne rembiapo vairã upe erejapose va'e ereiporu ramo. Ndaha'ëi Nhandejáry rekoharami ereikoko hagwã ereipota upe ne rembigerure. Ne akã-gwi rei ereikotevë e'ỹ reheve ereipota upe va'e. Nde rory rei hagwã mo'ã ne mba'era ereipota rei. Upéixa-gwi nome'ë mo'ëi nde-vy ne rembigerurekwe.

<sup>4</sup> Nhandejáry-gwi katu erejere jere rei nipo ra'e. Nane mandu'avéi-ma nipo ra'e kóa-rehe: Nhamoirû meme ramo tekó rei va'e-pe nanhande a'ëi ave Nhandejáry-rehe. Upe va'e nhe'ẽ okanhy-ma para'e ndéhegwi. Upéixa-gwi eremoirûse meme

ramo Nhandejáry-rehe ija'e'ŷ va'e, nde ave nande a'ei va'erã Nhandejáry-rehe.

**5** Nhandejáry nhe'ẽ ojehai va'ekwe nhande-vy nhahendu hagwã he'i va'ekwe nhande-vy:  
 "Nhandejáry omoĩ-ma nhande py'apy-py Nhe'ẽ Marangatu tee va'e. Hakate'ŷ voi nhande-rehe Nhe'ẽ Marangatu tee va'e. Ha'e oikwaa ukase va'e-rehe oipota nhane mandu'a meme nhanhemongeta-vy, hemimbota anho mante jajapo hagwã. Hakate'ŷ voi nhande-rehe Nhe'ẽ Marangatu tee va'e."\*

Upe va'e nhe'ẽ ojehai rei ra'e peẽ-my gwarãgwe voi nipo ra'e.

**6** Hembiaapo porã meme nhande-vy Nhandejáry nhane pytygwõ tygwõ voi. Upéa-rehe oĩ ave inhe'ẽ kwatia-rehe ohai va'ekwe:

"Nhandejáry ombojevy va'erã onhembotuvix-amba'e ukase va'e. Onhembotuvixase e'ŷ oiko va'e-pe ae ohexakwaa porã rei Nhandejáry"\*

he'i va'ekwe Nhandejáry ohai uka-vy.

**7** Aipo ramo penhemoĩ katu Nhandejáry yke-rehe. "Ndaikoséi voi xe anhaygwasu nhe'ẽ-rupi" peje kena. Upéixa ere ramo opoi arã ndéhegwi anhaygwasu.

**8** Enheme'ẽ katu Nhandejáry-pe ijyke reheg-warã. Ome'ẽ arã nde-vy ne arandurã. Ha'e ho'arandu-rupi nde rerekó. Ha'e nde yke-rehe onhemoĩ va'erã. Epoi katu ne rembiapo vaisehagwi. Ha nde, nde rekoha porã ra'anga va'e erova katu nde rekoha. Enhememongeta ngeta Nhandejáry

\* **4:5** Ex 20.1,5; 1 Co 6.19 \* **4:6** Pv 3.34

remimbota-rehe mate ponove erejere jere ereikovsky íxugwi.

<sup>9</sup> Nde reko vai eterei-gwi enhemboasy kena. Nde rekoha vaikwe-rehe ejahe'o ave. Anive ne rembiapo vai reheve erepuka puka teĩ ereiko-vy. Erejahe'o rei-vy hese eiko katu. Anive erekvy'a teĩ ne rembiapo vaikwe-rehe. Erenhemboasy-vy eiko katu nde rekoha vaikwe-rehe.

<sup>10</sup> Penhembohekogwyppye Nhandejáry-pe “Xe pytygwõ katu, xe Járy. Xe arandu e'ŷ ramo ndaxe pu'akáiry xéjehe. Ndaiko kwaái nde reko-rupi” peje kena Nhandejáry-pe pene moingo hagwã tekoha porã-rupi. Ha'e pene pytygwõ va'erã pende rovasa porã va'erã.

*Ani erenhe'ẽ rei rei nde rapixa-rehe  
(Mt 7.1-5; Lc 6.37-38; Rm 2.1-3; 14.1-4,10; 1 Co 4.5)*

<sup>11</sup> Ani penhe'ẽ rei rei ojóehe xe re'ýi kwéry. Nhande rapixa-rehe nhanhe'ẽ rei rei ramo nhanhe'ẽ rei ave Nhandejáry nhe'ẽ-rehe. Moisés amyrí remimombe'ukwe judeu re'ýi rekoharã-rehe nhanhe'ẽ rei ave. Nhande rapixa jajohu vai ramo, “Ivai” ja'e hese anho mo'ã. Nhandejáry nhe'ẽ Moisés amyrí rembihaikwe-rehe ave aipo ja'e ave. Upéixa ramo ndajaikovéi Moisés amyrí rembihaikwe pogwy-py. Nhande ae nhanhemoī rei jajohu hagwã hembihaike-rehe.

<sup>12</sup> Nhandejáry peteĩ va'e anho oiko omombe'u hagwã mba'eixagwa nhande reko jaiko porã hagwã ondive. Peteĩ anho nhande reko johu kwa'a va'e. Ha'e anho nhane resende kwa'a va'e. Ha'e anho nhane hundi kwa'a ave. Ndaijáiry erejohu

vai nde rapixa rembiapokwe. “Eresē-ma Nhandejáry remimombe'ukwe-gwi” ani ere teĩ íxupe.

*Ko'ẽ ramogwarā-rehe ndajaikwaái mba'eve*

<sup>13</sup> Pejeapysaka porã katu ko xe nhe'ẽ-rehe. “Jaha katu mombyry upe tetã ambue-py” peje nipo ra'e ojóupe. “Ãy jaha” “Ko'ẽ ramo jaha” peje nipo ra'e ojóupe peiko-vy ra'e. “Nhamba'apo-ta upepy. Nhande are-ta peteĩ mba'e agwyje-rupi upepy nhamba'apo-vy. Upe rire ae jaju jevy va'erã” peje nipo ra'e ojóupe. Upéixa pene nhe'ẽ ramo pejeapysaka katu ko xe nhe'ẽ-rehe.

<sup>14</sup> Mbava'e tipo peikwaa peẽ ko'ẽ ramo ojehu va'erã. Mba'eve. Ndapeikwaáiry pende rekoverã-rehe. Hatatĩ otimbo va'e-rami voi nhande rekoha. Sapy'ami anho jahexa, okanhymba jevy-ma. Upéixa ave nhande reko. Nanhande are aréi ko yvy-py. Sapy'a nhamano jevy va'erã. Avave ndoikwaái nhande óra nhamano hagwã.

<sup>15</sup> Upe va'e-rehe iporãve peteĩ teĩ peje “Nhandejáry oipota ramo ajapo-ta upéixa” peje.

<sup>16</sup> “Ko'ẽ ramo aha-ta upe-py” “Ko'ẽ ramo ajapo-ta upe va'e” ere nde rekora-rehe erekoy'a-vy. Upéixa ere ramo, “Xe remimbota-rupi aiko” ere nipo ra'e. “Nhandejáry remimbota-rupi aikose” nderéiry ndéjehe. Upéixa pene nhe'ẽ rei.

<sup>17</sup> Nhandejáry nhe'ẽ nhahendu rire hemimombe'u-rupi ae tekotevẽ jaiko. “Iporã” ja'e-ma ramo hese tekotevẽ jaiko inhe'ẽ-rupi. Hemimombe'u e'ŷ jajapo ramo “Ojere xe nhe'ẽ-gwi” he'i va'erã nhande-rehe. “Ojejav-y-ma xe-vy” he'i va'erã nhande-rehe Nhandejáry.

## 5

*Imba'e reta va'e pegwarā nhe'ē  
(Lc 12.15-21; 1 Tm 6.7-10)*

<sup>1</sup> Peē, pene mba'e reta reta va'e kwéry, pejeapysaka porā kena xe nhe'ē-rehe. Āy pene mba'e reta ramo jepe pehasa asy joto arā peē. Upéa-rehe penhemboasy mani pejahe'o kena.

<sup>2</sup> Pene mba'ekwe itujupa-ma va'erā. Pende ao porāgwe osoropa va'ekwe raso ho'u-ma va'erā. Ndahyvera porāvēi-ma pene mba'ekwe.

<sup>3</sup> Pene mba'e hepy va'e pende ouro, pende plata ave havēmba-ma va'erā. Pereko rei-ma pene mba'e reta. Nдовalevēi-ma pene mba'e. “Omba'e reta-rehe hakate'ŷ rei nipo ra'e. Ndovaléi voi” he'i arā pende-rehe pende rexaháry. “Omono'ō no'ō rei nipo om̄ba'e reta gwekoha porārā mo'ā hagwāra'e ojéupe gwarā. Hakate'ŷ te'ŷ rei nipo ra'e” he'i va'erā pene mombe'u-vy. Pene rembiapo vai-gwi, tata-py okái va'e-rami erekasa asy va'erā. Pemono'ō rei peē-my gwarā. Nhandejáry ae ohexatee voi. “Ivai eterei ne rembiapokwe” he'i va'erā peē-my.

<sup>4</sup> Pende kokwe-py om̄ba'apo va'e-pe ndapepaga porāiry. Pereko asy eterei pene rembigwái-pe. Upéa pene rembiapo vaikwe-rehe ha'e kwéry pene mombe'u-ma Nhandejáry-pe. “Ore rerekoha ore mbohasa asy asy” he'i-ma Nhandejáry-pe pende-rehe. “Onhembigwái vai ore-rehe. Omono'ō ojéupe gwarā ha nome'ē mo'āi ore rembiapo repy ore-vy” he'i pene mombe'u-vy Nhandejáry-pe. Ojeporiahuvereko uka Nhandejáry-pe pene rembigwái kwéry: “Ore repy

katu ore mbohasa asyhare-pe. Embohasa asy jevy íxupe” he'i ave Nhandejáry-pe. Ha Nhandejáry yváy pygwa, nhande ruvíxagwasu ipu'aka tee va'e ohendu-ma upe pene rembigwái nhe'ẽ. Oiporiahuvereko-ma íxupe kwéry.

<sup>5</sup> Ko yvy ári peiko jave pevy'a pene mba'e-rehe. Pejapose va'e rei pejapo. Pejogwase va'e pejogwa ave. Opaixagwa rei perekó yvy arigwa peiko va'e. Pekaru porã porã penhemongyra rei peikovy. Heta rei pene rembi'u. Pejapose va'e rei pejapo. Upéa-rehe Nhandejáry pene mondo-ta pende rereko asy hagwã-py pene rembiapo vaikwe-rehe. Ma'e mymba vérami ijáry omongaru va'e peẽ ave pene mongyra pende juka uka hagwã.

<sup>6</sup> Hembiapo vai e'ŷ va'e-pe “Ne rembiapo vai eterei” peje rei va'ekwe. Pejuka rei va'ekwe ave hembiapo vai e'ŷ va'e-pe. Ndaipu'akái mba'eve ojapo hagwã pende-rehe jave pejuka íxupe.

*Nhande kwerái e'ŷ reheve nhaha'arõ Nhandejáry-pe jaiko-vy*

<sup>7</sup> Upe va'e-gwi, xe re'ýi kwéry, Hesu reroviaha, pende reko pyatã joty katu pekirirĩ-vy peiko pende rereko asy ramo jepe. Peiko marangatu katu pende rereko asyha-pe. Nhandejáry Hesu ou jevyha áry-rehe peha'arõ katu. Ani pende kwérái teĩ ha'arõ-vy. Kokwe-py nhanhemity ramo nhaha'arõ va'e-rami nhaha'arõ katu Nhandejáry-pe. Nhaha'arõ ama nhanhemity hagwã. Oky rire katu jajaty henhoi hagwã. Oky jevy ramo, nhaha'arõ íxupe ombohi'a porã hagwã. Oky hagwã nhaha'arõ kwaa joty.

**8** Upéixa ave ani pende kwerái teĩ ha'arõ-vy Nhandejáry Hesu ou jevy hagwã-rehe. Agwĩ-ma ou jevy hagwã óra. Upéa-rehe peha'arõ porã kena peiko-vy.

**9** Ani pejoheko mombe'u mbe'u teĩ, xe re'yí kwéry. "Hekoha vai ko" ani peje teĩ pende rapixa-rehe. "Ne rembiapo vai va'e ko nde" ani ave peje rei teĩ íxupe ani hagwã Nhandejáry he'i nde-vy "Nde rekoha vai voi ko nde" he'i nde-vy. Agwĩ-ma ogwahẽ hagwã óra. Ha'e anho mate omombe'u kwaa nhane rembiapokwe-rehe.

**10** Pene mandu'a kena myamyrĩ rekokwe-rehe, Nhandejáry nhe'ẽ-py omombe'u va'etykwe rekokwe-rehe. Yma va'ekwe ha'e kwéry Nhandejáry pogwy-rupi omombe'u mbe'u va'ekwe inhe'ẽ. Inhe'ẽ-gwi ndojeresi-gwi ohasa asy ramo jepe, omombe'u mbe'u joty va'ekwe inhe'ẽ. Nonhe'ẽi joty ombohasa asyhare-pe. Upéixa nahembiapo vaíry ha'e kwéry. Ha peẽ katu pehasa asy jave, pene mandu'a kena myamyrĩ rekokwe-rehe. Ha'e-rami peiko porã kena, xe re'yí kwéry. Ani pene rembiapo vai teĩ pene nhe'ẽ-rupi.

**11** Upe myamyrĩ kwéry-rehe ja'e "Ovy'a voi Nhandejáry nhe'ẽ mombe'uhatygwe. Ohasa asy jepe omombe'u joty inhe'ẽ. Ogwerovia kwaa araka'e Nhandejáry-pe" ja'e hese. Pene mandu'a kena Jó amyrĩ-rehe. Ha'e ojerovia voi va'ekwe Nhandejáry-rehe. Ohasa asy asy jepe, heko pyatã joty oiko-vy. Ojerovia tee joty va'ekwe Nhandejáry-rehe pono inhe'ẽ-gwi ojere gwembiapo vairã apovy. Pene mandu'a kena. Oiporiahuvereko joty ave Jó-pe Nhandejáry. Upéi ombopyahupa jevy

íxupe imba'e retave hagwā. Upéixa voi Nhandejáry iporā porā voi nhande-vy. Oiporiahuvereko va'e Nhandejáry.\*

**12** Pejeapysaka porā kena xe re'yi kwéry. Ani ereiporu ambue va'e réry erembojerovia uka hagwā ne renduha-pe ne nhe'ẽ-rehe. Ani ereiporu yvāy, yvy réry ave ne renduha kwéry ogwerovia hagwā ne nhe'ẽ. "Ajapo-ta" ere ramo, ejapo katu. Nderejaposéi ramo "Ndajapo mo'ãi" ere katu. Ani nde apu rei teĩ. Anhetegwa mate pemombe'u katu. Upéixa nde reko pyatā ramo ne nhe'ẽ rei jepe ogwerovia arã ne renduha. Ha nane mbohasa asýi va'erã Nhandejáry.\*

**13** Pehasa asy ramo pemondo pene nhe'ẽ Nhandejáry-pe. Pevy'a ramo, peporahéi katu Nhandejáry-pe pemboete-vy.

**14** Nde rasy ramo, erehenói uka katu Hesu reroviahä rerekwa-pe ou hagwā nde rexä. Ou rire, ojerure va'erã Nhandejáry-pe ne mbogwera hagwā. Omoõ arã mix̄i nhandy ne akã-rehe a-rami he'i-vy: "Nhandejáry Hesu réry-py amoõ-ta ne akã-rehe ko nhandy" he'i arã nde-vy.

**15** Upéixa he'i ramo, ombogwera va'erã hasy va'e-pe Hesu ójehe ojerovia-gwi. Hesu omopu'ã jevy va'erã íxupe. Ha oĩ ramo hembiapo vaikwe, omboyke va'erã ixugwi oresende hagwā.

**16** Upéa-gwi iporā nhande Hesu reroviahä va'e nhanhemombe'u katu ojóupe jajejavý hagwe "Amboasy-ma xe rembiapo vaikwe" ja'e ojóupe nhanhemombe'u-vy. Nhandejáry-pe ave nhanhemombe'u nhane mboasyha. Tajajerure

---

\* **5:11** Jó 1.21-22; 2.10; 42.10,12; Sl 103.8    \* **5:12** Mt 5.34-37

kena nhandéjehē nhane mbogwera hagwā Nhandejáry. Opy'a ete gwive ojerure va'e-pe ohexā ūka opu'akaha Nhandejáry hembijerure ome'ē-vy.

<sup>17</sup> Ymagware Nhandejáry nhe'ē-py omombe'u va'etykwe, Elias amyrī oiko va'ekwe. Nhanderami oiko va'ekwe voi Elias. Yma va'ekwe omondo mondo onhe'ē Nhandejáry-pe "Anive eremongy ore-vy" he'i ojerure-vy. Ha ndokyvēi va'ekwe íxupe kwéry. Hembijerurekwe ojapo va'ekwe íxupe Nhandejáry. Inhe'ē rendu-vy omongy po'o-ma íxupe. Are-ma voi oky po'o tee-ma. Mbohapy ro'y haimeje jevy ogwahē outro ro'y-py ohasa va'ekwe oky e'ŷ rehēve.

<sup>18</sup> Upe rire ae-ma Elias amyrī ombojeupi jevy onhe'ē Nhandejáry-pe oky jevy hagwā-rehe. "Xe Járy" he'i "emongy jevy katu ore-vy" he'i Tupā Nhandejáry-pe ojerure-vy. Inhe'ē ohendu-gwi Nhandejáry omongy jevy íxupe kwéry. Oky porā jevy-ma íxupe kwéry. Henhói porā jevy-ma va'ekwe temitŷgwe. Elias amyrī rekokwe-rami peiko katu. Pende py'a ete gwive pembojeupi pene nhe'ē Nhandejáry-pe pene mbaraete-vy. Perovia íxupe pene rembijerure ra'arō-vy.

<sup>19</sup> Xe re'yí kwéry, Hesu reroviaha va'e, oĩ para'e pene pa'ū-my Nhandejáry rape porā-gwi ojere jere va'e. Penhemonhe'ē katu íxupe kwéry ogwerova hagwā gwekoha onhembohekoha porā jevy hagwā.

<sup>20</sup> Pene mandu'a kena Nhandejáry rape-gwi ojere va'e-rehe. Jarojevy ramo íxupe hekoha porā hagwā-rupi jevy oiko hagwā, oheja hagwā gweko vaikwe oiko porā jevy hagwā Nhandejáry ndive,

nharesende íxupe. Nhandejáry nomondói va'erã  
íxupe ohasa asy hagwã-py. Omboyke va'erã íxugwi  
hembiapo vaikwe. Heta heta hembiapo vaikwe  
jepe omboykepa joty va'erã íxugwi.

**Nhandejáry Nhe'ẽ  
New Testament in Kaiwá (BR:kgk:Kaiwá)**

copyright © 2006 Wycliffe Bible Translators, Inc.

Language: Kaiwá

Translation by: Wycliffe Bible Translators, Inc.

**Copyright Information**

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Kaiwá

**© 2006, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files  
dated 29 Jan 2022  
7ba4d793-0e4f-5efd-8f91-509f2a6d9f6a